



LAMPIRAN B
MALAY

SIARAN AKHBAR

BRUNEI DARUSSALAM ISLAMIC CAPITAL MARKET (BICAM) CONFERENCE 2024 5 – 6 Zulhijjah 1445 bersamaan dengan 12-13 Jun 2024

1. Brunei Institute of Leadership & Islamic Finance (BILIF) dengan kerjasama INCEIF University, Malaysia dan dengan sokongan Brunei Darussalam Central Bank (BDCB), telah menganjurkan Brunei Darussalam Islamic Capital Market (BICAM) Conference 2024 sebagai salah satu pengisian bagi Persidangan dan Pameran Pertengahan Tahun Brunei 2024 (Brunei MYCE 2024). BICAM 2024 yang turut disokong oleh Bank Islam Brunei Darussalam (BIBD), Perbadanan Tabung Amanah Islam Brunei (TAIB) dan Standard Chartered Bank Brunei (SCB) ini berlangsung dari 12 - 13 Jun 2024 di Mulia Hotel, Brunei Darussalam.
2. Bertemakan “Mobilising Islamic Capital Market for Sustainable Development”, antarlain objektif persidangan ini adalah untuk menampilkan pakar-pakar tempatan dan antarabangsa yang terkemuka untuk membincangkan isu dan cabaran yang relevan dalam pembangunan pasaran modal Islam terutama dalam konteks Negara Brunei Darussalam. Ia juga akan meneroka strategi-strategi yang berkaitan untuk mempertingkatkan kedayatahan, kelestarian dan keterangkuman ekosistem pasaran modal Islam di samping berkongsi pengalaman negara-negara lain mengenai impak pasaran modal terhadap pertumbuhan ekonomi. BICAM 2024 ini juga dihasratkan akan dapat membantu untuk mempromosikan Negara Brunei Darussalam yang berpotensi sebagai sebuah destinasi pusat kewangan Islam antarabangsa.
3. Hari pertama persidangan ini dimulakan dengan ucapan alu-aluan Yang Mulia Dayang Hajah Sufinah binti Haji Sahat, Ketua Pegawai Eksekutif, BILIF. Beliau menyampaikan penghargaan kepada Kementerian Sumber-Sumber Utama dan Pelancongan atas peluang untuk menyertai acara tahunan Brunei MYCE. Beliau juga merakamkan ucapan terima kasih kepada INCEIF University atas kerjasama sebagai rakan acara untuk menganjurkan BICAM buat kali ketiga. Selain itu, YM Dayang Hajah Sufinah menekankan kepentingan inisiatif meningkatkan kesedaran dan pendidikan untuk menggerakkan pasaran modal Islam bagi pembangunan mampan, selaras dengan objektif persidangan.

4. Persidangan kemudian diikuti dengan ucapan oleh tetamu kehormat majlis, Yang Mulia Dayang Hajah Rokiah binti Haji Badar, Pengarah Urusan, BDCB selaku Pengerusi, Lembaga Pengarah BILIF. Dalam ucapan tersebut, beliau menekankan kepentingan untuk mengambil peluang serta menerokai inovasi dalam menerapkan prinsip kewangan Islam untuk menangani cabaran dan mencapai matlamat negara. Selain itu, beliau juga menyentuh mengenai peranan penting teknologi dalam memajukan industri, menekankan potensi teknologi untuk memacu transformasi ke arah kecekapan dan perkembangan. Beliau turut menggesa usaha kerjasama di kalangan pengamal industri pasaran modal Islam, pihak regulator, dan pihak berkepentingan untuk menangani cabaran-cabaran baru seperti kedaya tahanan siber, teknologi kewangan, dan perubahan iklim, di samping menegaskan kepentingan untuk menyediakan penyelesaian holistik bagi memastikan kestabilan dan pertumbuhan sektor pasaran modal Islam.
5. Barisan penceramah-penceramah antarabangsa yang menyampaikan pembentangan khas semasa persidangan tersebut ialah Dr Sutan Emir Hidayat, Pengarah, Komite Nasional Ekonomi dan Keuangan Syariah (KNEKS), Indonesia; Dr Hurriyah El Islamy, Ketua Pegawai Eksekutif dan Pengasas, HGC Firm, Indonesia; Profesor Dr Eskandar Shah, Profesor Kewangan Islam, Hamad Bin Khalifa University (HBKU), Qatar; dan Mohd Yusri bin Yusof, Pakar Mobilisasi Sumber Kanan, Islamic Development Bank (IsDB). Persidangan tersebut turut memuatkan sesi-sesi perbincangan panel yang menampilkan 23 penceramah tempatan dan antarabangsa yang membahas mengenai pelbagai topik berkaitan dengan tema persidangan.
6. BICAM 2024 akan diteruskan pada hari kedua dengan pembentangan yang merangkumi topik-topik seperti “Challenges of Achieving Sustainable Development Goals (SDGs)”, “Waqf Sustainable Solutions”; “Sukuk – A Formidable Sustainability Instrument”; “Seeding Sustainability through Waqf”; dan “Digital Assets and Sustainable Development”.
7. Persidangan tersebut akan diakhiri dengan ucapan penutup oleh Profesor Emeritus Dato’ Dr Mohd Azmi Omar, President dan Ketua Pegawai Eksekutif, INCEIF University.
8. BILIF, sebagai sebuah pusat kecemerlangan bagi industri kewangan dan kepimpinan di negara ini, sentiasa komited menjalankan misinya untuk membentuk pemimpin, pakar dan pemacu inovasi masa depan terutama dalam bidang kewangan Islam dan kepimpinan melalui program dan acara bertaraf antarabangsa. Maklumat lanjut mengenai BILIF boleh didapati melalui laman web BILIF di www.bilif.com.bn atau akaun Instagram @bilif.bn.